



Las cantadoras ed il cantadur cun lur menadras Flavia Walder-Hublard ed Annatina Nay (davos senieste e dretg).

FOTOS G. BEELI



Igl auditori astga buc mo selegrar da bialas melodias mobein era da coreografias garte-giadas. Cheu las cantadoras, il cantadur e la dirigenta Flavia Walder durent l'emprova dalla canzun Banana Señor.

Promoziun dalla cultura cantica en Surselva

L'jamna da cant per affons e giuvenils ha puspei liug a Trun

DA GIUANNA BEELI / ANR

■ **L'jamna da cant per affons e giuvenils a Trun ha uonn liug gia per la 13avla gada. El center da quei camp, organisaus dil District da cant Surselva, stat la promoziun dil cant e la finamira eis ei dad entusiasmar ils participants per quei bi art cultural. L'anr ha fatg ina viseta al camp.** Cura ch'jeu sun entrada el zulèr dalla casa da scola da Trun han vuschs lontan e tuns da clavazin beneventau mei. Cun suandar la musica sundel arrivada avon igl esch dalla sala da cultura. Spitgond in amen avon esch e cun tedlar, parevan las cantadoras ed ils cantadurs d'aver grond tschaffen. Entrond ei quella pareta seconfirmada.

20 affons e giuvenils, 19 mattatschas e sulettamein in buob, eran occupai cun cantar, saltar e suandar l'instrucziun dalla dirigenta Flavia Walder-Hublard. Annatina Nay, la secunda menadra, ha tedlau, mirau co ils affons han fatg la coreografia emprendida e dau cussegls. «Quei sto esser pli frestg», ei siu facit, «knackig, sco ina riebela cu ti mordas lien.» Lu ha il chor entschiet danovamein, quella gada pli frestg.

Las duas menadras partan il direger. Aschia ha Annatina Nay surpriu la bitgetta tier la proxima canzun. Quella ei pli ruasseivla, denton astgass viver dapli. «Tut sto esser pli legher, pli freh» ha Flavia Walder constatata alla fin dalla canzun. Ins senti ch'ei seigi miez dall'jamna,

ils affons seigien staunchels – ellas era. Quei denton cun raschun. Enteifer mo dus gis han ils scolars studegiu ed empriu ordadora in grond repertori da canzuns en differents lungatgs. Tier mintga canzun s'aida aunc ina pintga coreografia. Danunder ch'ellas prendien lur motivaziun da prestar ton durent las vacanzas, haiel jeu dumandau in pèr participantas. Il plascher da cantar e far musica seigi la pli gronda motivaziun, denton era il contact e novas enconuschientschas cun mattatschas da lur vegliadetgna seigi «lessig», han ellas manegiau. Scatschar la liung'uriala seigi denton era in bien motiv da separticipar.

Lungurus ha daveras negin cheu a Trun. Las emprovas han liug la damaun

ed il suentermiezgi, mintgamai pli gitg che duas uras. Marenda porscha la Casa Depuoz e las seras astgan tuts serender a casa.

Per sluccar l'atmosfera d'emprender ed il ritmus da camp han las duas menadras procurau la mesjamna suentermiezgi per ina pintga sorpresa. In'emprova scursanida suandada dad ina viseta silla piazza da giugs e vitier aunc glace ha fatg plascher ton als pli pigns sco era als giuvenils.

Naven dalla gievgia ei il chor aunc vegnius rinforzaus dils pli giuvenils participants. Il camp ei numnadamein partius en duas gruppas. Igl emprem cuors (quel da gliendisgis tochen vendergis) sedrezza primarmein a scolarAs naven

dalla 5avla classa e pli vegls. SclarAs naven dalla 1. entochen la 4. classa han giu la pusseivladad da frequentar il camp naven da gievgia entochen vendergis.

L'jamna da cant cuoza aunc tochen vendergis sera, cun in concert final sco punct culminont. Igl auditori astga selegrar dad in program fetg variont e frestg e d'in viadi atras differents lungatgs e differents culturas. Las cantadoras, ils cantadurs e las duas dirigentas selegrasen dad in grond publicum. Tuts lavuran aunc vid ils davos detagls per saver presentar in bi e bien concert.

Il concert ha liug vendergis, ils 10-8-2012, allas 19.00 ella Sala da cultura a Trun.

GLION

In «gie» dil cussegl dil marcau alla fusiun

(anr/hh) Il cussegl dil marcau da Glion propona a vischinas e vischins d'acceptar la fusiun cun 13 ulteriuras vischnauncas. A sia emprema seduta suenter las vacanzas da stad ei l'executiva da Glion sefatschentada danovamein dil project da fusiun «Glion plus». Ella ha approbau unanimamein il contract da fusiun per mauns dalla radunonza dil marcau dils 16 da november 2012. Medemamein ha il cussegl dil marcau decidu unanimamein da sustener la fusiun. Suenter haver examinau intensivamein il project vegn il cussegl alla conclusiun ch'els avantatgs dalla fusiun surpeisan claramein. El center stat ina megliera situaziun finanziaria sco era il nez economic che sedat entras la fusiun. Tenor il cussegl dil marcau daventa la vischnaunca nova pli attractiva per famiglias e l'administraziun communal sa vegnir professionalisada e porscher survetschs adattai alla clientella. Plinavon ei il cussegl dil marcau da Glion dil meini che l'influenza dalla nova vischnaunca ella regiun ed el cantun vegni ad esser pli gronda che quella da 14 vischnauncas singulas. Il cussegl ei per tscharts dalla responsabladad dil marcau da Glion sco part dalla regiun. Cun in «gie» al project da fusiun duei el demusar quei senn da responsabladad.

reclama

DERUNGS AG
electro
920 00 00

Perfecziunament en Val Blegn

Bands giuvnas dalla Surselva seperfectiuneschan a Dangio ella Val Blegn

■ (gb/anr) Sch'ins serenda quest'jamna sur il Pass Lucmagn, varga Olivone e cuntinuescha il viadi encunter Bellinzona, vargan ins il vitget tessines Dangio. Atgnamein nuot special, mo sch'ins teidla bein, rebattan tuns da clavazin, bass, ghitarra, batteria e schizun saxofon atras la Val. La raschun per quei fenomen particular ei l'jamna da camp per bands dalla Scola da musica Surselva. Per la tiarza gada ha quel liug gest sur il cunfin grischun ella veglia fabrica da tschugalata da Cim-Norma. 32 scolars che fuorman en tut siat bands perfectiuneschan lur musica cun agid da tschun scolasts. Quels scolasts ein musicists da professiun. Mintgin instruescha in auter instrument. Andriu Maissen ei responsabels per la batteria, Christian Müller pil clavazin. Omidus ein dil reminent commembers dalla formaziun da jazz «Clamür». Plinavon instrueschan Andreas Conay da Laax, bass, Karin Streuli, cant, e Corsin Stecher, ghitarra.

Pils scolars, mo era pils scolasts, ei quei in'jamna intensiva. Gi per gi treneschan ed instrueschan els bunamein otg uras musica. «Sch'ins patratga: quei ei bunamein aschi bia sco quei che las singulas bands treneschan igl entir onn», ha Corsin Stecher, igl iniziand dil camp, constatata el discurs cull'anr. Daveras – durent quest'jamna sunan las bands 40 uras, dapli bunamein che durent igl onn.

Las bands survegnan normalme in ina gada ad jamna ina lecziun instrucziun. Perquei haveva Corsin Stecher surpriu l'iniziativa da far in camp in-



Las quater impurtontas vuschs dad ina band ei la batteria, la ghitarra, il clavazin ed il cant.

FOTO C. STECHER

tensiv cullas bands. «Finamira eis ei da promover la musica e da motivar ils participants da sunar», raquenta Stecher. Denton buc mo la motivaziun seigi impurtonta mobein era l'ambiziun. «Ils scolars ston vuler», gi el. Aschia profiteschan las gruppas, buc mo dils menaders professiunals, mobein era in da l'auter. «Sch'in ghitarist da 12 onns auda – e vesa – con bein ch'in ch'ei mo dus onns pli vegls suna,

chescha l'ambiziun ed el trenescha dapli», finescha Stecher.

Il program dil camp ei fetg vasts ed ei vegn pretendiu bia dils participants. La damaun han mintgamai liug luvratoris. Quels tractan divers stils da musica e gidan las bands d'anflar lur agen stil. Suenter la pausa da miezgi cuntinuescha l'instrucziun cun referats ord las pli diversas spartas dalla musica. Suenter ina cuorta pausa cuntinueschan las provas

individualas. Pervia da quei program concentrau durent il gi havessan ils scolars atgnamein liber la sera. Remarcabel ei denton che bunamein finadina band serenda danovamein il local d'emprova e suna ni scriva las atgnas canzuns tochen tard viaden ella notg.

La sonda suentermiezgi, ils 11 d'uost, allas 13.00 tochen las 15.00, presentan las differents bands a Dangio il resultat dall'jamna da camp. L'occorrenza ei libra.